



جابتن مفتي نكري قهغ

قوله تعالى:

فَسَأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ

السلام عليكم ورحمة الله وبركاته

Soalan :

Assalamualaikum

Saya ingin bertanya, bolehkah seorang wanita yang dalam keadaan haid membaca al-Quran dengan niat untuk belajar, tetapi dia bukan seorang penghafaz. Terima kasih.

وعليكم السلام ورحمة الله وبركاته

Jawapan :

Alhamdulillah, bersyukur kita ke hadrat Allah ﷻ, selawat dan salam atas Nabi besar Junjungan kita Muhammad ﷺ beserta keluarga dan sahabatnya ﷺ, dan mereka-mereka yang mengikut segala sunnah Nabi Muhammad ﷺ sehingga ke hari kiamat. Terima kasih kepada saudari, di atas soalan yang telah diajukan kepada kami.

Dalam memahami permasalahan ini, kami membahagikan dua pandangan ulama':

Pertama : **Jumhur fuqaha**

Wanita yang dalam keadaan haid atau nifas **diharamkan** membaca al-Quran secara mutlak dalam semua keadaan (menanggung dan memegang al-Quran). Perkara ini berdasarkan hadis Ibn Umar :

“ لَا تَقْرَأُ الْحَائِضُ وَلَا الْجُنُبُ شَيْئًا مِنَ الْقُرْآنِ ”

"Tidak dibolehkan wanita dalam haid dan yang berjunub membaca walau sedikit daripada al-Quran." (Riwayat al-Tirmizi - hadis ini hadis daif)

(Lihat mazhab Hanafiyah dalam Mabsuth 3/152, Malikiyyah dalam Mukhtashar Al-Khalil hal: 17-18, Syafi'iyah dalam Al Majmu' 2/67, Hanabilah dalam Al-Mughny 1/137).

Kedua : Ibn Abbas, Imam al-Nawawi, Ibn Jarir al-Tabari, al-Syaukani, Abu Thaur, Imam al-Syafie dalam qaul qadimnya, Syeikh al-Azhar Ali Tantawi dan Ulama' bermazhab Maliki

Wanita yang menghafal al-Quran **dibenarkan/diharuskan** untuk mengulangi hafalan mereka ketika haid. Bukan sekadar itu, guru dan ustazah yang haid juga boleh mengajar al-Quran seperti biasa bagi tujuan memenuhi keperluan mendidik ummah yang lebih besar maslahatnya. Jika mereka diharamkan berbuat demikian, maka akan berlaku banyak keburukannya seperti hilangnya hafalan dan sebagainya.

Berasaskan dua pandangan diatas, jabatan ini berpandangan **haram** hukumnya jika seorang wanita yang dalam keadaan haid membaca al-Quran dengan niat untuk belajar dengan ketiadaan guru dihadapan. Jika sekiranya ada guru, dibolehkan kerana ilmu merupakan satu perkara yang wajib di cari dan mesti ada guru yang mengajarnya. Dan boleh juga puan membaca al-Quran sekiranya puan menghadapi peperiksaan atau ujian, ini berdasarkan pandangan mantan Syeikh al-Azhar, Syeikh Jad al-Haq Ali Jad al-Haq melalui bukunya "*Buhuthun wa al-Fatawa*". Cuma untuk lebih berhati-hati digalakan puan membaca al-Quran yang ada tafsir atau terjemahan dengan niat zikir. Ataupun untuk lebih berhati-hati lagi ialah cukuplah sekadar dengan hanya mendengar al-Quran melalui video, mp3 dan sebagainya untuk tujuan pembelajaran.

وَاللَّهُ أَعْلَمُ بِالصَّوَابِ وَإِلَيْهِ مَرْجِعُ الْمَأْبُوتِ

Rujukan :

1. Terjemahan Al-Quran
2. Hadis al-Tirmizi